

Las tschalereras



Val Plattas (Medel)

Foto DRG

Las tschalereras che catschan ils tiers en il malsegir

Ina saira da stad, durant ch'ils pasters eran vid la tschaina, levàn ils sterls en stavel tuttenina si e fuin sco selvadis. Las tschalereras, che vegnivan a bratschas, faschevan ina canera sgarschavla e chatschavan els en tanta malura. In grond sterl grisch siglia tuttenina sur in grip giu, ed ils auters siglian suenter. Ils pasters han savì far nagut auter che star a guardar, perquai ch'igl era vegnì stgir. L'atra damaun eran tut la biestga en stavel.

Las tschalereras en l'alp da Plattas

Las tschalereras da l'alp da Plattas avevan chatschà ina giada las vatgas tras in trutg privlus e stretg, nua che quellas pudevan uschiglio

ir mo ina suenter l'atra. Ils famegls han già tema che las vatgas gajan tuttas sutsura, ma l'auter di eran tuttas en stavel.

Las tschalereras da Segnas

Tranter la Val Segnas e Mompé-Tujetsch devi pli baud entiras rotschas da tschalereras. Quellas eran vestgidas mintgatant sco las pli finas e bellas dunschellas e chantavan chanzuns da bellezza. Mintgatant eran ellas malnettas e sdratschadas e fagevan in terribel sbragizi.

La gliעד aveva gronda tema dad ellas, malgrà ch'ellas na faschevan mai donn, auter che sche insatgi avess laschà in uffant en clavà en iral. Sin quai eran ellas adina sco narras e gievan en rotschas a bratschas per ils clavads enturn.

Chattavan ellas in uffant en iral, sche gievan ellas cun quel ch'ins na chattava el mai pli. Mettev'ins dentant ils uffants sin ladritsch, nun avevan ellas nagina pussanza.

Las tschalereras da Glion

A Glion serviva ina matta en la «Cruna». Ina notg ha ella udì a barterlar dad aut ed en plirs linguatgs giu avant chasa. Cun quai ch'igl era glina plaina, ha ella guardà or da fanestra, ma ella nun ha vesì nagin, mo udì a rir ed a sghignar. Ella ha tschiffà ina sgarschavla tema, e l'atra damaun è ella stada malsauna. Ella aveva udì las tschalereras.

Las tschalereras a Faltscharidas

Ina saira da stad turnan duas dunas da Faltscharidas, ch'eran stadas l'entir di vi Sontga Gada a lavurar, a chasa per mulscher las chauras. Endadens Sontg Placi siglia tuttenina in snuaivel giat nair ord in chagliom e suonda las duas dunas fin avant chasa.

Arrivadas a chasa mulschan ellas las chauras e van lura en chasa e serran la porta. En stiva fan ellas glisch e cumenzan a dir rusari. Tuttenina audan ellas in rampluniez si sur chasa. La porta-chasa s'avra cun in terribel sbat, ed il rampluniez, stgadanim, curriez e trampluniez vegn anc pli ferm.

Plain tema guardan las duas dunas or da fanestra e vesan in'entira societad da tschalereras che fan il barlot e sautan.